

## REGLUGERÐ

### um löggildingu rafiðnfræðinga, rafvirkjameistara og rafvirkja sem raflagnahönnuða.

#### 1. gr.

Rafiðnfræðingar, rafvirkjameistarar og rafvirkjar, sem höfðu á tímabilinu 1. janúar 1992 til 1. janúar 1996 fengið samþykki opinberra aðila fyrir raflagnauppdráttum, eiga rétt á að starfa sem raflagnahönnuðir, með þeim takmörkunum, sem greinir í reglugerð þessari, enda sæki þeir um slíkt leyfi til umhverfissráðuneytisins fyrir 1. janúar 1997.

Sama rétt eiga þeir rafiðnfræðingar, rafvirkjameistarar og rafvirkjar, sem störfuðu þann 1. janúar 1996 við raflagnahönnun undir umsjón og eftirliti aðila með löggildingu skv. 12. gr. byggingarlaga nr. 54/1978, án þess að hafa í eigin nafni fengið samþykki opinberra aðila fyrir raflagnauppdráttum.

#### 2. gr.

Í umsókn um starfsleyfi og meðfylgjandi gögnum skal eftirfarandi koma fram:

1. Nafn umsækjanda og kennitala.
2. Heimilisfang umsækjanda.
3. Vottorð um að umsækjandi hafi lokið sveinsprófi eða meistaraprófi í rafvirkjun eða rafiðnfræðingsprófi frá Tækniskóla Íslands.
4. Skrá yfir raflagnauppdrætti sem umsækjandi hefur hannað ásamt upplýsingum um stærð heimtauga viðkomandi veitna í amperum.
5. Vottorð frá byggingarfulltrúa eða rafveitum, sem starfað hafa í umboði byggingarfulltrúa, um móttöku og viðurkenningu á verkum þeim sem um getur í 4. tölulið.
6. Þeir sem starfað hafa við raflagnahönnun, en ekki fengið í eigin nafni samþykki opinberra aðila fyrir raflagnauppdráttum skulu, auk þeirra gagna sem um getur í 1.- 4. tölulið, leggja fram vottorð frá vinnuveitanda um að þeir hafi starfað við hönnun raflagnauppdráttu. Í vottorði vinnuveitanda skal koma fram hvaða raflagnauppdrætti umsækjandi hefur hannað ásamt upplýsingum um stærð heimtauga viðkomandi veitna í amperum. Ef gögn þau sem talin eru upp í 1.-6. tölulið 2. mgr. eru ófullnægjandi, skal umsækjanda gefinn kostur á að bæta úr því.

#### 3. gr.

Umhverfissráðherra veitir takmarkað starfsleyfi að fenginni umsögn nefndar sem í eiga sæti fulltrúj umhverfissráðherra, Félags byggingarfulltrúa, Iðnfræðingafélagsins, Rafiðnaðarsambands Íslands, Skipulags ríkisins, Tæknifræðingafélags Íslands og Verkfræðingafélags Íslands. Skal nefndin hafa lokið störfum fyrir 1. mars 1997 og ráðherra gefið út leyfin fyrir 1. apríl 1997.

#### 4. gr.

Starfsleyfi rafiðnfræðinga, rafvirkjameistara og rafvirkja til hönnunar raflagna er takmarkað samkvæmt því sem hér segir:

1. Þeir sem ekki hafa starfað við hönnun að staðaldri, en fengið teikningar samþykktar hjá opinberum aðilum, eiga rétt á leyfi til að hanna raflagnir til og með 63 A (230/400 V).
2. Þeir sem störfuðu við hönnun að staðaldri þann 1. janúar 1996, eiga rétt á leyfi til að hanna raflagnir í hús með heimtaugar til og með 315 A (230/400 V).

3. Þeir sem starfað hafa að staðaldri við raflagnahönnun, eiga rétt á takmörkuðu starfsleyfi til að hanna raflagnauppdrætti í samræmi við stærð þeirra uppdráttu sem þeir hafa hannað undir umsjón og eftirliti löggildra aðila eða fengið samþykki opinberra aðila fyrir.

## 5. gr.

Reglugerð þessi er sett samkvæmt heimild í ákvæði til bráðabirgða í lögum nr. 92/1996 um breyting á byggingarlögum, nr. 54/1978, með síðari breytingum og öðlast þegar gildi.

*Umhverfissráðuneytinu, 26. nóvember 1996.*

**Guðmundur Bjarnason.**

*Ingimar Sigurðsson.*

## SAMÞYKKT

fyrir reynslusveitarfélagið Reykjavíkurborg.

### Félagslegar íbúðir.

## 1. gr.

Borgarstjórn eða Húsnæðisnefnd Reykjavíkur ákvarðar til hvers konar félagslegra íbúða (lánaflokka) lánnum í því skyni er varið, þ.e. félagslegra eignaríbúða, félagslegra kaupleiguíbúða, félagslegra leiguíbúða eða almennra kaupleiguíbúða.

## 2. gr.

Allar umsagnir um íbúðakaup eða framkvæmdir verða unnar af Reykjavíkurborg. Á framkvæmdatímanum ber Reykjavíkurborg ábyrgð og hefur eftirlit með framkvæmdum jafnt tæknilegum sem fjárhagslegum og sendir staðfestingu á verkstöðu hverju sinni. Um stærð og gæði íbúða fer eftir almennum reglum Húsnæðisstofnunar ríkisins.

## 3. gr.

Að öðru leyti gilda lög um Húsnæðisstofnun ríkisins.

## 4. gr.

Úttektaraðili skv. 6. gr. laga um reynslusveitarfélög fylgist með framkvæmd samþykktar þessarar og metur hvernig til hafi tekist.

## 5. gr.

Samþykkt þessi, sem borgarráð Reykjavíkur hefur staðfest með heimild í 10. gr. laga um reynslusveitarfélög, nr. 82/1994, öðlast gildi þegar í stað og gildir til 1. janúar 2000.

*Félagsmálaráðuneytinu, 18. nóvember 1996.*

**Páll Pétursson.**

*Þorgerður Benediktsdóttir.*